



Rabu, 22 Januari 2025
Ogen: Jakup 1:12-13



Megengeng Ngalaken Percuban



Percuban mekatep jadi i bas kegeluhen. Maun la si sangka-sangka reh ia nderpa kegeluhen. I bas percuban e mekatep mpeturah kebiaren, aru ate, kekoten, urak semangat, peturah pinakit, la siangkan sada ras sidebanna bage pe ernembekh ate man Dibata. Asa bancina ula min reh percuban e, bage me rusur niarapken.

Perpulungen si elai Jakup marpar merap i taneh perlanjangan. Kegeluhen i bas perlanjangan mbue ngalaken percuban, sabap tupung si e perpulungen e labo ngena ate jelma si enterem apai ka pemerenta. Ikataken me ia musuh man negara. Erbage-bage perbeben si nderpa erbahanca piga-piga surut bas erkiniteken. Guna mpekeke ras mpeteguhi kiniteken perpulungen si bage rupana, Jakup mpeseh kata kata semangat segelah lanai ngidah maka percuban e senjata si mpekote kegeluhen. Kune reh percuban nderpa arus megenggeng. Kalak si megenggeng e ndatken tuah kap. Jadi iubah me cara rukur perpulunge e. Adi ndube percuban e erbahanca ia surut, genduari percuban e erbahanca ia ngaloken tuah, kesangapen, kemalemen ate. Carana arus megenggeng. Kinigenggengen e me proses si mabai kita guna tetap setia, ernalem man Dibata. La terjeng si e, ibassa pe kita banci tole rukur, erlajar, ertimbang-timbang kai nge ndia si arus ipekena guna banci reh ulina, reh jorena ku wari-wari si reh enda. Si enda penting ilakoken. Sada kata bijak singataken maka *"tanpa refleksi kita berjalan membabi buta, menciptakan lebih banyak konsekuensi yang tidak diinginkan dan gagal mencapai sesuatu yang bermanfaat."* I bas kerina percuban sinanami kita e lit pelajaren entah persinget si isehken e maka pakelah waktu guna ngukurisa. I je me kita perlu erpenungkunen man Dibata ras man kalak si ernngo erpengalaman kerna si e. Alu arapen maka tambah pemeteh, pengalaman si meherga i bas kegeluhenta.



